

## Hanya 40 peratus rakyat beli barang Malaysia: Saifuddin

NOOR AINULYAKIN ISHAK | | 5 September 2019

KUALA LUMPUR – Hanya 40 peratus rakyat negara ini yang membeli barang buatan Malaysia.

Menteri Perdagangan Dalam Negeri dan Hal Ehwal Pengguna (KPDNHEP), Datuk Seri Saifuddin Nasution Ismail berkata, peratus tersebut menunjukkan jumlah pembelian yang masih rendah meskipun ramai yang tahu tentang kempen beli barang Malaysia.

“Memetik kajian selidik yang telah dijalankan oleh Universiti Teknologi Mara (UiTM) 2015, antara hasil dapatan mendapati 75 peratus rakyat tahu tentang adanya kempen beli barang buatan Malaysia yang dijalankan oleh kerajaan.

“Tetapi tahap komitmen rakyat untuk membeli barang buatan Malaysia (sebanyak) 41 peratus sahaja. Dorongan untuk membeli kurang,” katanya ketika menyampaikan ucapan di Majlis Pra Pelancaran Kempen Beli Barang Malaysia di sini hari ini.

Menurutnya, iklan dan promosi beli barang Malaysia semata-mata didapati agak kurang memberikan kesan dalam mengubah persepsi rakyat.

“Sebaliknya jika digabungkan iklan, promosi dan penganjuran ekspos serta karnival jualan, maka ia didapati lebih mendatangkan kesan terhadap keseluruhan kempen,” katanya.